

# S'Ufitziu de sa Limba Sarda o Isportellu de limba sarda.

Su sardu est una limba de minoria, reconnota dae una lege istatale: sa 482 de su 1999. S'artìculu 9 de custa lege previdit sos isportellos, o ufitzios de sa limba sarda.

Cada Comune ponet a disponimentu de sos tzitadinos unu servìtziu nou chi benit dadu dae s'operadore de sa limba sarda: una pessone chi tenet una formatzione ispetzìfica, chi est capatza de *bortare in sardu impreende normas gràficas chi sunt sas matessi in totue*.

Pro ite iscrìere totus a sa matessi manera? Ca cun sa norma gràfica si cheret dare normalidade e ufitzialidade a su sardu, cale si siat limba tenet una norma ebbia.

Figuramus•nos una Sardigna in ue onniunu iscriet a manera sua..., nde diat a bessire a pìgiu un'atzoroddu cumpletu, e in pagas paràulas non si diat a cumprèndere su babbu cun su figiu!!! Iscriende onniunu comente prus l'agradat, comente diat èssere possibile pro su sardu a àere ufitzialidade in sas iscolas, in sos ufitzios e in totue?

Tocat a betare fràigos siguros e chi a bellu a bellu bèngiant reconnotos dae totus<sup>1</sup>.

*S'operadore est a disponimentu de totus sos chi sunt interessados a su sardu pro cale si siat àmbitu.*

Sa punna, pro mèdiu de sos isportellos de sa limba sarda, est cussa de:

- fàghere a manera chi crescat in sa gente una cussèntzia prus manna de limba sarda, a manera chi custa limba sigat a campare in su chistionu e in s'iscritu (**sensibilizare**)
- fàghere a manera chi su sardu diventet limba normale e duncas balanget su matessi balore de sas àteras limbas (**amparare**)
- fàghere a manera chi su sardu tèngiat visibidade, difatis sos avisos de sos Comunes diant dèvere essire dae sos ufitzios in versione bilìngue, est a nàrrere in italianu e in sardu; su matessi in sos sitos de sos comunes in ue bi diant dèvere èssere partes in sardu a costàgiu de s'italianu. (**ispartzighinare/difundere**)
- dare a sa gente inditos subra sas normas iscritas e comente las impreare (**informare**)
- dare consulèntzia in cale si siat àmbitu pro totu su chi pertocat s'argumentu limba sarda

Ma proite totu custu? Ais a nàrrere bois.

- ✚ Ca su sardu est una limba e no unu dialetu
- ✚ ca su sardu est limba istòrica e tenet su deretu de esistere a costàgiu de s'italianu e de s'inglesu
- ✚ ca sos sardos divent àere su deretu de manigiare sena brigòngia sa limba issoro cada die in onni logu.<sup>2</sup>

S'operadora Antonella M.M. Licheri

---

<sup>1</sup> Semus totus responsàbile de sa limba, pensade a s'isfortzu chi a s'incomintzu fintzas un'operadore at dèvidu fàghere pro iscrìere figiu e non fizu, o balàngiu e non balanzu. Cadaunu si devet fàghere càrrigu de custa responsabilidade e sacrificziu (su de impreare sa norma) pro su bene e su benidore de sa limba, si a beru sa limba s'istimat e si si cheret chi siat bida dae totus comente normale.

<sup>2</sup> non nos ismentighemus chi su sardu est sa limba nostra chi est ligada a sa cultura nostra, a lu pèrdere no est cosa de bonu, diat èssere una làstima manna: totu unu mundu diat iscumpàrrere. Est custu chi cherimus? Nòssede